

Colosenses

Pablo ishim Porrosht aabo ör saludo.

1 ¹Yok Pablo. Yok Jesucristo ir apóstol pork Porrosht sahmür uje tiyokoräha oso ir ahwoso. Timoteo de lika pahir. ²Oyuhu yet chichew ana hutita par tokosim olak uje olak Porrosht aabo uje olak dechi dit Colosas uje ye otiislo Cristope. Sehe tuu Porrosht uu eyok Deych dosir olak hn duhu olak aho kiis.

Pablo hör shish ör orar par Porrosht aabo.

³Shish öryok orar par olak hn oyina Porrosht uu eyok İrhîch Jesucristo ir Deych, ⁴pork oyunt uje olak ye otiislo Jesucristope, hn nos ahmürlo Porrosht aabo yewo ⁵pork olak erahalo erze premyo uje ich ihîrtso uje Porrosht yesh tibeyihi wahacha poörc par olak. Uje entloni erze uje ich ũru uje Jesús tokite hn ishi olak hnitewihi Porrosht ahir ich entlo toy erze uje dechi poörc wir par olak. ⁶Yeëk de uje shiyokoräha olakni shuu itsorz hn otatehe İrmo lekitiyo toy. Oso ich okihniya lekitiyo uje ye olotiispe erze ahwoso heke oshiyokör uje ich om hn shish ma okihniya uje ye olotiispe shi itso uje tokolihi olak uje entloni hn erahalo uje ich ũru uje Porrosht sahmür olak. ⁷Epafras wichi shiyokoräha olakni. Wichi öryok leshap toy uje oyahmürpa. Shiyokör Porrosht ibiyo itso öryok hn yelij sehi lahwoso uje tata. Uje tatim olak Cristoni ich takashim öryok oyiyokör Cristo ir ibiyo. ⁸Wichi tatim öryok uje Porrosht İchibich shuu ahmürloye.

⁹Ese deeych uje tatim öryok shuu itsorz nehech ele ahle shish öryok orar par olak par uje Porrosht İchibich shuu olak eykdeyo par uje erahalo uje Porrosht sahmür. ¹⁰Oyapur Porrosht par uje ahakörlo uje ich om pork olak ir aabo hn ir aabo tyenij oshiyokör uje eyok İrhîch sahmür. Uje ahakörlo uhulo itsorz ich shish ahakörlo uje ich om hn shish ma erahalo Porrosht ir İluu. ¹¹Oyapur Porrosht toy par uje ishim olak ukurbo par uje olak ewenta nos wir erze kuche uje tîr olak. İr ukurbo deyo de uje ire pwele ishim olak par uje shish entiloye hn shish olak ayla. ¹²Heke shish enilo eyok Deych Porrosht pork wichi nishii olak par uje etîrlo ire

ahir nehe hn ishīm olak erze uje ich ihĩrtso uje tyenij ishīm daabo nehe wahacha Porrosht ahir uje luu chihit orĩhi.

Cristo tooho krus eeych par shuu or aho kiisihi Porrosht.

¹³Porrosht chiyuhu eyokihĩ Satanás hme uje shi itso uje eyok de dihlelta hn chibĩte eyok Deyjĩt hme. Ich sahmũrpa Deyjĩt. ¹⁴Wichĩ uje ishĩ eyok hnitewihĩ Porrosht ahir hn Porrosht perdonar eyok erze kuche mĩhnũwo uje yiyokorlo.

¹⁵Cristo wichĩ seetship ir Deych Porrosht. Nĩhyok ye latik nomo ir Deych. Cristo ich ma dich je nos wir kuche uje Porrosht shiyokorkite. ¹⁶Cristo nos shiyokor kuche uje de poorc hn uje de lika hnimich, erze uje eyok pwele yomo hn erze uje ye eyok pwele yomope, itso erze anjele uje ye eyok pwele yomo orpe, erze anjele uje or ukurbo deyo hn erze uje or ukurbo yerij deyo hn erze uje or ukurbo arhaabo hn erze uje ma or ukurbo pikaap. Nos wir or ire wir uje Porrosht shuu Cristo shiyokorkite par uje wir oshuu Cristo dich. ¹⁷Cristo ichii dekite ehn yahpaa nos kuche chihĩpe. Porrosht shuu wichĩ nos tibey erze kuche par uje ye nihna irpe. ¹⁸Cristo wichĩ shi itso Porrosht aabo or huta hn Porrosht aabo wir shi or itso Cristo ir yũhurrza. Wichĩ webich osht uje tokolihĩ erze topo or ahĩrkite hn ich ye toypo par uje wichĩ ich ma dich je nos wir kuche hn ich ma dich je nos wir oso toy, ¹⁹pork Porrosht sahmũr uje Cristo ir iluu shi itso ir iluuta. ²⁰Porrosht chihla Jesuskite par uje shuu oso or aho kiisihi ire, erze uje de lika hnimich hn erze uje de wahacha poorc. Shi uje tooho krus eeychkite hn ir armista noshi ich shuu nos or aho kiisihi Porrosht.

²¹Titim olak uje antkite ich olak dukuhlehe Porrosht hn olak eyuwo mĩhnũwo heke shuu ey olak imāha Porrosht pork shish ahakorlo uje ich mĩhnũwo, ²²per ele ahle ich olak aho kiisihi Porrosht shi pork Cristo ishīm ire oso hn oshuu oshuu toy par uje hnoy olak seya olak Porrosht ahir nehe. Ese deeych uje hnoy olak shuu itsorz ich olak iluu itso Cristo ir iluu. Nĩhyok ye latik pwele tata uje olak hnitew dechi ²³kimiji ye otiislo Cristope hn ye olak koswāha. Shi olak itso uhwirbe uje ochihitsim hn oshiyeru hn ich etan. Ye ompe uje moymlo uje anemlo par etarol olak owich uje de Porrosht ahir pork Jesús ishĩ olak hnitewni. Wir erze ahwoso uje entloni, hn wir erze uje otsanĩmirāha otatim erze oso uje ode irmo lekĩtiyo. Yok Pablo uje tomsaha par uje tanĩmirāha erze ahwoso toy.

Porrosht chibĩte Pablo par uje sosir or.

²⁴Titim olak uje ich pehet kiis uje oshiyokor mĩhnikĩhi yok par olak. Erze mĩhnũwo uje tĩr yok wir shi itso uje Cristo tatni uje tyenij tokolihĩ yok par uje takashim erze Porrosht aabo yewo. Porrosht aabo wir shi or itso Cristo ir yũhurrza. ²⁵Porrosht chihla yok par ir ibik par uje tokosir

olak hn nos tiyokorāha olak erze ir ahwoso. ²⁶Antni Porrosht ye duhu oso odirehepe uje dihipo kināho tyenij omasaha par ir aabo, per ele ahle ich shuu laabo ochiraha. ²⁷Porrosht sehe duhu odiraha erze uje ye oso odiraha petikni. Erze ahwoso uje shuu ochiraha tata shuu itsorz im: — Cristo tyenij de olak aho uje olak dihipo kināho par uje erahalo uje olak owich de Porrosht ahir hn shi anemlo uje etārlo poōrc nehe.— ²⁸Heke nos oyitim ōr uje Cristo tooho krus eeychni par ōr. Uje tiyokorāha ōr ich tiyokorāha ōrpa par uje ochiraha hn ye otār urhuta bahluta ehēt nehe. Shish oyakit ōr par uje deeych yet nehe hn oyukwi ōr oyeya ōr Porrosht ikich. Ich ōr iluu ihir pishi itso Cristo ir iluu. ²⁹Uje tiyokōr ahnūwo obiyo tuu itsorz, ich tinaha yok hn Cristo takashim yok chāra lakirbo.

2 ¹Sehe tuu erahalo uje tinaha yok par uje tokosir olak, hn par erze Porrosht aabo yewo uje ode wahacha dīt Laodicea, hn par nos wir Porrosht aabo yewo uje yelij onomo yok. ²Shish tiyokōr tuu itsorz par uje tuu olak duurapo hn par uje tuu erze Porrosht aabo yewo oduurapo par uje shish otsahmūrye. Heke erahalpa erze uje Porrosht ye duhu yewo odirehepe. Wir erze Cristo ir iluu. ³Cristo nos chiraha kuche hn ire pwele shuu erahalo toy. ⁴Ahnūwo uje titim olakike wir par uje erahalo par uje nīhyok ye latik pwele sehn̄yēr olak. Wir ochirahapa ochiilehet par otsehn̄yēr oso. ⁵Yok Pablo. Ye yok chihī olak ahirpe, per tībīte shi itso uje pichibich de olak ahir. Ich pehet kiis uje olak aho kiisihye hn yelij olak koswāha Cristo.

⁶Shi ye otiislo eyok Irhīch Jesucristo petikni heke amsahalo par olak Porrosht aabo. Ele ahle shi tyenij ma ye otiislo ire par uje ahakōrlo uje ire sahmūr. ⁷Heke olak itso erze pohir uje ich uro yaka hn ye kaype. Ye otiislo Cristo hn shish ma ye otiislo ire shi itso uje oshiyokorāha olakni, hn shish tyenij enilo Porrosht.

Cristo shuu Porrosht aabo ōr iluu ahle.

⁸Titim olak par uje abeylship olak par uje nīhyok ye latik pwele sehn̄yēr olak chāra deyuwo uje ye ūrpe. Erze ōr ahwoso ich ye jukur pork ōr ahwoso ye ilope uje Cristo shiyokorāha oso. Wir shi otata uje ōr poruwo wishī otata. Erze ōr ahwoso shi tāra demonyo, ye tāra Cristope. ⁹Nos wir Porrosht ukurbo hn ir eyuwo nos de Cristo, ¹⁰hn Cristo nos de olak aho heke Porrosht ukurbo hn ir eyuwo de olak toy. Cristo ich ma dich je nos wir erze uje ōr ukurbo deyo de. ¹¹Olak de Cristo heke ich shi itso uje Cristo chibite olak asa yarta waa je iich otsii sirkunsisyon, per ye waa yarta yatape waa je hnakirbo ochibite ōr uje ochiyuhu ōr yūhurrza pikaabit. Asa yarta waa je Cristo chibite olak wichī uje chiyuhu olak iluu mihnū. ¹²Uje otohirm olak ich shi itso uje ochihitsim olak hnimich uut, hn uje ochiyuhu olak awit uut ich shi itso uje olak ikpo hn mēylo Cristo uje ikpo pork ye otiislope uje Porrosht shuu Cristo ikponi hn tokolihi erze

topo òr ahir. ¹³Antni ahakòrlo kuche mihñüwo heke shi olak itso topo. Nihyok ye yarta chihì olak ahope waa je iich otsii sirkunsisyon. Olak iluu shish mihñü pork ye Porrosht diyuhupe, per ele ahle ich olak Porrosht aabo heke ishìm olak ese ikirìt uje yelij nihna ire pork ye otiislo Cristope hn ire perdonar olak nos wir kuche mihñüwo uje ahakòrlo. ¹⁴Yiyokòrlo uje ich mihñüwoni. Yiyuwe Porrosht ir ley per Cristo nos ishi eyok hnitew uje de Porrosht ahir shi itso uje nos chichew erze mihñüwo uje yiyokòrlo chibite hutita hn chibite asa hutita krus eeych hn chiwa klabo pork wir uje Cristo ishi uje tooho krus eeychkite. ¹⁵Cristo nos serz erze demonyo uje òr ukurbo deyo de hn erze yewo, hn chibite orhòta uje serz òr. Uje Cristo tooho krus eeych ich nos serz òr.

¹⁶Heke titim olak par uje ye uhu onehnyër olak erze uje otata uje ahakòrlo mihñüwo. Sehe onarim olak erze oposo uje elilo hn erze uje ehelo, hn sehe oduhu ahakòrlo òr ahmiyo uje òr ire otsahmür o sehe oduhu ahakòrlo uje otsahmür uje shekurko toy o kimiji sabta. ¹⁷Nos wir erze ahwoso uje otatim olak wir shi Porrosht siteëta Cristo uje shiyokor uje taachihì nàhu irmökite. Jesucristo wichì ich ürpa, per erze israel oso òr ahmiyo uje oshiyokòr wir shi Porrosht siteëta Cristo hn tyenij oym erze òr ahmiyo uje siteëta ire pork Cristo taächkite.

¹⁸Ye eëtlo erze uje sehe onehnyër olak. Shi sehe oduhu enaha olak premit heke sehe oduhu eeychàhalo anjele. Wir otata uje òr ukurbo de shi pork omo hn ochikëra anjele. Shi onarim ire, per shi tãra òr eyuwo uje oshuu tisër erze mihñüwo. ¹⁹Oym erze ahwoso uje ich üru uje tãra Cristo. Wichì shi itso uu Porrosht aabo òr huta, hn Porrosht aabo wir shi òr itso Cristo ir yühurrza. Oso otibey neyühurrza heke otaak par uje òr ukurbosh, hn òr itiso tehìye par uje ochishew obiyo hn nos tokole om pork òr ikiyo om heke ich òr kresa. Shi itso oso òr huta uje tibey òr yühurrza ich shi itso uje Cristo nos tibey Porrosht aabo hn shish ma shuu òr iluu itso deluu. Wichì uje Porrosht sahmür.

²⁰Moymlo uje ahakòrlo erze kuche mihñüwo shi uhulo itso uje atilo mëylo Cristo uje toni. Erze mihñüwo tãra demonyo uje tibey oso uje ye odiraha Porroshtpe uje ode nàhu irmo per Cristo chiyuhu olakihi demonyo òr hme. ¿Inaapo heke sehe eeshlopo ahakòrlo erze kuche mihñüwo shi itso uje olak de òr hmepo? ¿Inaapo ahakòrlo erze òr ley uje oshìm olak? ²¹Otatim olak otsii: —Ye asilo, hn ye elilo, hn ye akahirlo.— ²²Per nos wir kuche Porrosht chibite par sosir oso hn erze kuche shi sihna ire shichish. Erze òr ley uje otatim olak shi tãra oso òr eyuwo ²³hn shuu oso òr eyuwo tisër uje erze ley ich om hn shuu oso oteeychãha Porrosht, hn erze ley ye duhu onarim irpe hnii shuu oshiyokòr mihnikihì neyühurrza, per erze ley ye jukur par uje sontew erze òr iluu mihñü.

3 ¹Titim olak uje moymlo olak iluu mihñüni ich shi itso uje atilo hn mëylo Cristo uje toy hn mëylo ire uje ikpo pork olak iluu ich

ahle, heke tyenij ahmūrlo erze kuche uje de poōrc. Cristo dechi, hn yesh sakaha Porrosht ir waächta pork wichi ich dich toy. ²Uhu olak eyuwo tis̄ir erze kuche uje de Porrosht ahir, hn ye shi uhu olak eyuwo tis̄ir erze kuche uje de nāhu ĩrmo. ³Olak ich moymloni erze kuche mihñūwo uje ahakōrlo shi itso uje atiloni, hn Cristo tibey olak ikiritīhi Porrosht ahir. ⁴Cristo wichi uje ish̄im eyok ese ikirīt. Uje cheeshpo t̄ir hñimich nehe ich olak mēylo ire, hn ire ich hūrpa.

Porrosht aabo tyenij oym deluu iler hn oshiyokōr deluu ahle.

⁵Heke titim olak, moymlo erze kuche mihñūwo uje de nāhu ĩrmo shi itso uje atilo. Erze mihñūwo uje oso oshiyokorīhiye wir tata shuu itsorz. Ich mīhnik uje hnakirbich hn timcharrza ye onōyhi pishye ahirpe hn shi omuhuye ahir. Ich mīhnik uje timcher timcher ōhyiyer ahir, hn ich mīhnik uje hnakirbo hnakirbo ōhyiye ahir. Ich mīhnik uje yeēk sahat loshipit, hn ich mīhnik uje yanak shuu loshipit sahat ire. Ich mīhnik uje pikihñino hn pikihñine oshiyokorīhiye oshuu itsorz. Ye ompe uje sehe ahakōrlo uhulo itsorz, hn ich ye ompe uje uhu olak eyuwo tis̄ir erze kuche mihñūwo. Ye ompe uje ekutirāha olak kuche pork uje ahakōrlo uhulo itsorz ich shi itso uje eeychāhalo erze olak kuche eylo olak porroshtīhi. ⁶Nos wir erze kuche mihñūwo uje titim olakike uje oso oshiyokōr oshuu itsorz ich tyenij shuu Porrosht chesdelpa nehech sepyēr ōr. ⁷Antni olak iluu itso ōr heke ahakōrlo uhulo itsorz, ⁸per ele ahle ich tyenij nos moymlo ahakōrlo erze mihñūwo. Moymlo uje aas olak uulo shichish, hn moymlo uje ehmerlo olak ehemurc olak aho. Ye uhu olak iljaabo, hn moymlo uje athilo olak ukushiīhi oso par uje uhu otsitak yet. Ye eyuhu olak ahwoso mihñuwōho olak ahwo, ⁹hn ye ata olak ukushiīhiye, pork moymlo erze olak iluu iler uje ich mihñū uje wapni shish ahakōrlo. ¹⁰Uhu olak iluu ahle uje yesh Porrosht nishii par uje ich uhurc nehe hn olak iluu itso Porrosht ir iluu. Wichi uje shuu olak iluu ahle. ¹¹Ye latikish kimiji olak griego yewo o kimiji olak israel yewo. Kimiji olak yarta de waa je iich otsii sirkunsisyon, o kimiji nīhyok ich ye latikish. Hn ye latikish kimiji olak dihipo kināho uje ye odiraha latik o kimiji olak dihipo kināho uje ma ye odiraha latik. Ye latikish kimiji olak ōr yilo o kimiji ye ōr yilope. Shi uje yirahalopa Cristo wichi uje ma om.

¹²Titim olak uje Porrosht chihla olak par olak ir aabo pork sahmūr olak hn sehe duhu olak iluu ilo deluu, heke tyenij eenilo erze uje ōr losuhlaabo hn osirlo ōr. Shish tyenij osirlo yewo, hn ye olak narim olak. Ye owāhaloye per tyenij eenthiloye. ¹³Tyenij olak ewenta olak lesh̄ibo hn uje olak yeēk niyokōr mihñikīhi lesh̄ibich ich tyenij duhu dehet kiisihi ire hn dikey uje shiyokōr mihñikīhi ire shi itso uje eyok ĩrh̄ich perdonar eyok. ¹⁴Per kimiji ahmūrloye ich ma om par olak je nos wir erze ahwoso yewo uje titim olakike pork uje ahmūrloye ich nos olak aho kiisihiye hn

ye etakloyepe. ¹⁵Cristo wichi uje shuu olak aho kiis pork shuu erahalo uje ich om par ahakörlo, heke shi ahakörlo uje shuu olak aho kiis. Porrosht chiihla olak par uje shi olak weeta nohmira shi itso Cristo ir yühurza, hn shish tyenij enilo Porrosht. ¹⁶Enaha olak par uje erahalopa Cristo ir ahwoso. Ahakorāhaloye hn akitloye hn uhulo olak eyuwo tišir uje ich om par atimloye. Ye uhulo olak koswāha uje eeychilo eētlo salmo hn eētlo imno hn korito hn enilo Porrosht. ¹⁷Nos wir erze uje ahakörlo hn nos wir erze uje athilo wir uje tyenij uhulo tokole om pork Jesús wichi uu eyok Irhīch hn ahakörlo par ire, hn tyenij enilo Porrosht uu eyok Deych hn ērlo eyok Irhīch Jesucristo ir iich.

**Pablo sakit Porrosht aabo uje ör irēhtish
hn Porrosht eebe uje ör abiyosh.**

¹⁸Titim olak timcher, tyenij ahakörlo uje olak abich tatim olak pork eyok Irhīch sahmūr uje ahakörlo uhulo itsorz. ¹⁹Hn titim olak hnakirbo, olak tyenij ahmūrlo olak irēhte hn ye abiterlo ör. ²⁰Hn titim olak pikihñino hn pikihñine, nos tyenij ahakörlo uje olak deych hn olak data otatim olak pork eyok Irhīch sahmūr uje ahakörlo uhulo itsorz. ²¹Hn titim olak hnakirbo uje olak aabo ode, ye ahakoslo ör nehech uhulo ochesdelo. Kimiji uhulo ör dosdarak ich ye uhulo duurape. ²²Hn titim olak uje olak ör yilo, tyenij nos ahakörlo uje olak yinsiro otatim olak. Ye shi uje oteychim olak ich hnii eyuhulo olak. Ye uhu olak aho yühirsh. Tyenij ahakörlo uje titim olakike pork atililo eyok Irhīch Jesucristo. ²³Nos wir erze uje ahakörlo ich tyenij enaha olak par uje ahakörlo shi itso uje ahakörlo par eyok Irhīch, ye shi par hnakirbope. ²⁴Uje aachihilo eyok Irhīch ahir nehe ich erahalo kimiji ahakörlo uje om uje olak de nāhu irmo, ich ishim olak erze kuche uje de ire ahir wahacha poör, pork uje ahakörlo olak ibiyo ich ahakörlo Cristo ir ibiyo. Wichi uu olak Irhīch pisht. ²⁵Yeēk uje shiyokör uje ich mihñüwo, Porrosht tyenij shuu erze kuche mihñüwo cheeshpo tīr ire nehe. Ye olak kināhope pork Porrosht ye duhu yewo ör kināhope hn duhu yewo ör kināho. Shuu nos ör itsye.

4 ¹Titim olak uje olak yilo hn olak yile ode, tyenij enshiilo ör. Erahalo uje olak Irhīch de toy, wichi uje de poör.

²Nos titim olak par uje shish olak orar apurlo Porrosht. Uje olak orar ich enilo Porrosht hn ye uhu olak eyuwo tišir kināha. ³Olak orar toy apurlo Porrosht par öryok par uje Porrosht duhu tokole uje öryok pwele oyanimirāha ir ahwoso oyitim erze oso uje Cristo ishi ör hñitewihi Porrosht ahirkite. Ye nos odirehepe uje Cristo shiyokorīhi örne shuu itsorz. Shi pork tanimirāha ir ahwoso heke ochimchaha yok karsel ehēt.

⁴Olak orar apurlo Porrosht par uje tuu imeheeych uje titim ör Cristo, pork tyenij tiyokör tuu itsorz par uje ochiraha. ⁵Ahakorihilo om ör ile ikich erze uje ye ör Porrosht aabope par uje kimiji onahmūr ich olak

pwele atimlo òr Cristo. Ye moymlo òr per ahakorãhalo òr. ⁶Shish uhu olak ahwoso om shi itso sal uje ich om par oposo par uje erahalo erze ahwoso uje ich om par atimlo òr erze uje sehe odiraha, hn ye ehnewlo olak ahwoso uje atimlo òr.

Pablo ishim Porrosht aabo òr saludo.

⁷Titim olak uje Tíquico wichi eyok leshap uje tahmürpa. Yelij sehe lahwoso uje tata. Wichi takashim yok uje tiyokör eyok írñich ír ìbiyo. Tyenij tatim olak nos wir kuche uje tokolihi yok, ⁸heke tuu hno tñr olak par uje shuu erahalo erze uje tokolihi yok hn par uje shuu olak duurapo. ⁹Tuu Onésimo hno ìya ire. Wichi eyoklo leshap toy uje tahmürpa. Yelij sehe lahwoso, shish shiyokör. Wichi olak ihnapsa. Wir tyenij nos otatim olak erze kuche uje tokolihi òryok. ¹⁰Aristarco ishim olak saludo. Wichi pihyërak. Oshiyeru toy ochibite pahir ele karsel eheth. Marcos ishim olak saludo toy. Wichi Bernabé ír primo. Kimiji Marcos taachíhi olak ahir nehe ich enshiilo ire shi itso uje asa hutita yata tata uje tokosim olakni. ¹¹Jesús ishim olak saludo toy. Wichi iich yet otsii Justo. Marcos hn Justo wir pihnapso israel yewo uje òya erze pihyëre yewo uje otakashim yok tanimírãha Porrosht ahwoso par uje oyuhu oso omasaha par Porrosht aabo. Marcos hn Justo oshuu pehet kiis. ¹²Epafras ishim olak saludo toy. Wichi olak ihnapsa, hn wichi Jesucristo ír ìbik. Shish sinaha ire par uje ire orar sapur Porrosht par olak par uje ye olak koswãha ire, hn par uje erahalo nos wir erze uje Porrosht sahmür uje ahakörlo. ¹³Tikiraha uje Epafras shish shuu deyuwo tisírñi olak hn ire orar par olak hn erze Porrosht aabo yewo toy uje odechi dit Laodicea hn par erze uje odechi dit Hierápolis. ¹⁴Lucas ishim olak saludo toy. Wichi lotor, hn tahmürpa ire. Demas ishim olak saludo toy. ¹⁵Atimlo erze Porrosht aabo uje ode wahacha dit Laodicea uje tokosim òr saludo toy. Atimlo asa Ninfa toy hn nos wir Porrosht aabo uje shish otakasho lahwichihi ír ihyuch uje tokosim òr saludo toy. ¹⁶Uje nos olak ler asa hutita nehe ich sehe tuu asimlo erze Porrosht aabo uje odechi dit Laodicea par uje òr ler toy, hn tyenij olak ler toy asa hutita uje tichewni hn tokosim erze Porrosht aabo uje odechi dit Laodicea. ¹⁷Sehe tuu atimlo Arquivo par uje niyokör erze obiyo uje eyok írñich ishim ire par uje shiyokör.

¹⁸Yok Pablo. Tuu ochichew ana hutita per ana hutita uhurc ich yok tichew par uje erahalo uje tãra yok. Tokosim olak saludo. Sehe tuu shish olak orar apurlo Porrosht par yok pork yesh yok de karsel eheth. Sehe tuu Porrosht dosir olak.